

## Es I Ddim I Ganada

Es i ddim i Ganada  
Ym mil naw saith deg tri  
Er dyna oedd fy mwriad  
Cyn i mi gwrdd â thi  
Fe glywais leisiau eraill  
Yn galw fi o'r tir  
Sy'n gorwedd ar y gorwel  
Tu draw i'r dyfroedd clir

Es i grwydro Erin  
Yn dy gwmni di  
Ger dyfroedd du Loch Gowna  
A choedwig Killykeen  
Dros diroedd uchel Galty  
I'r corydd brwyn a'r mawn  
I ganfod hanes Mícheál  
A chenedl go iawn.

Ar aelwyd gynnes Sean  
Ces hanes yr amser du  
Am 'ynnau wedi'u cuddio  
A dieithried yn y tŷ  
Teuluoedd wedi dioddef  
Sŵn loriau yn y nos  
A sŵn esgidiau trymion  
Yn rhedeg ar y clos

Fe ges fy swyno yno  
Gan y pibydd wrth y bar  
Ces fy nychryn hefyd  
Gan y garreg ger y cwar  
Ond dyma'r unig le'n y byd  
Dwy'n teimlo mod i'n rhydd  
I alw'n hun yn aelod  
O genedl gwbwl rhydd.

Gwlad hen aur, gwlad y gair  
Gwlad y bythol wyrdd  
Gwlad y rhydd, gwlad'r hen ffydd  
Gwlad breuddwydion byw.